

Plie u Prof. Pramod Tandon ia ka Treining Prokram ha Value Additions to Rich Bio Resources in North East Region



Ka St. Edmund's College kaba la ioh ia ka kyrdan STAR STATUS COLLEGE na ka Department Biotechnology, jong ka Sorkar India ka la pynlong ka treining prokram kaba shibnai kaba la sdang naduh 13 tarik u Lber, 2018. U Prof. Pramod Tandon, u Vice Chancellor barim jong ka North-Eastern Hill University bad uba long mynta u CEO, ka Biotech Park, Lucknow, u la plie ia kane ka treining prokram kaba la ai kyrteng "Value Additions to Rich Bio Resources in North East Region" kaba la pynlong da ka Biotechnology Department ka St. Edmund's College ryngkat ka jingiatreilang bad ka Biotech Park, Lucknow. Kane ka treining prokram na ka bynta ki samla pule jong ka St. Edmund's College kan ai jingtip halor ki buit kiba thymmai

ha ki jait kam kiba pher kiba iadei bad ka jingpynmih syntiew, ka jingshna umsoh bad kiwei kiwei. Ha ka jingkren jong u kum u Kongsan, u Prof. Pramod Tandon u la ong, "ki Jylla Shatei Lam Mihngi ki don haduh 50 na ka shipah ki jingthung jingtep kiba kham pher bad kiba don dor. Ka donkam ia ki samla jong ki Jylla bapher ban mih shakhmat bad ban wad ki lad ki lynti jong ka juk kaba mynta khnang ba kin long ym ki nongwad kam hynrei ki nongai kam ai jam". U la ong ruh, "Ka jingpule ia ka saian ka dei ban pynkup bor ia ki samla". U Dr. Rishi Shankar, uba dei u saiantis uba la shang kylleng ka pyrthei, ha ka jingkren jong



u u la ong, "Ki briew jong ka Jylla Meghalaya ki dei kiba donbok tam namar ki don kiei kiei kiba kiwei pat ki bynta jong ka pyrthei kim don. Nga khot ia phi samla ban long ki nongpynneh ia kane ka spah bah kaba phi don". U Br. Simon Coelho, ha ka jingkren jong u u la khot ia ki khynnah ban long kiba minot bad kiba trei shitom, khlem ka jingminot yn ym lah ban kot sha ka jingjop. U Dr. Sylvanus Lamare, u Principal jong ka Kolej ha ka jingkren jong u, u la pyni

kumno ka Kolej ka pyrshang ban plie ki lad ki lynti sha ki samla da kaba phah ia ki sha ki jaka kiba pher ban kham ioh jingtip ha ki jingpule kiba kham shalor. U la pyni bad kdew ruh ba ka Jylla ka dei kaba riwspah ha ki jingthung jingtep kiba long dawai bad ka donkam ka jingwad bniah ban pynneh bad kyntiew ia ki khnang ban ioh ka jingithuh na ka pyrthei bad ruh ban long ka jingkiew ha ka jingpynsaphriang ia ki. Ka la don ruh ka jingpynkup burom ia u Prof. Pramod Tandon na ka bynta u synniang jong u sha ka Kolej. Ia ka prokram la pyni aid da ka Prof. S. Challam bad ia ki kyntien ai khublei la ai da u Dr. Sunil Sharma.